

Poštovani polaznici „Međunarodne Ljetne škole - Upravljanje u uslovima migrantskih kriza“,

Kao dekan Fakulteta za kriminalistiku, kriminologiju i sigurnosne studije Univerziteta u Sarajevu iznimno sam ponosan i sretan zbog pokretanja programa „Međunarodna Ljetna škola - Upravljanje u uslovima migrantskih kriza“. Ovaj internacionalni projekat necikličnog oblika obrazovanja realizujemo u punom partnerstvu sa Filozofskim fakultetom Univerziteta „Sv. Kiril i Metodij“ iz Skopja, Makedonija, i Veleučilištem Velika Gorica iz Republike Hrvatske.

Fakultet za kriminalistiku, kriminologiju i sigurnosne studije Univerziteta u Sarajevo je još prije nekoliko godina prepoznao značaj cjeloživotnog učenja iz oblasti kriminalistike, kriminologije i sigurnosti, te od 2015. godine kontinuirano provodi programe cjeloživotnog obrazovanja, kroz neciklične akademske programe usmjerene prije svega na jačanje kompetencija i potrebnih vještina svojih studenata, kao i profesionalaca iz sigurnosnog sektora.

Nakon niza izuzetno uspješnih ljetnih i zimskih škola koje su realizirane širom Bosne i Hercegovine, ovog ljeta, u junu 2018. godine izlazimo van granica naše države, te Međunarodnu ljetnu školu „Upravljanje u uslovima migrantskih kriza“ održavamo u Makedoniji – u Skopju i Gevgeliji. Ovaj regionalni akademski program će na jugu Zapadnog Balkana okupiti studente i profesionalce čije je šire i uže interesovanje sigurnost u svim njenim pojavnim oblicima. Očekujemo da se u Skopju okupe studenti i praktičari iz Bosne i Hercegovine, Makedonije, Hrvatske, Kosova i ostalih država iz Regiona, te da kroz pohađanje ovog programa značajno povećaju kapacitete postojećih vještina i kompetencija, kada je u pitanju djelovanje i postupanje u kriznim situacijama, i to onim uzrokovanih upravo migrantskom krizom.

Namjera nam je povezati i obučiti značajnu grupu mladih ljudi sa teritorije Zapadnog Balkana, koja će u budućnosti moći i znati primijeniti stečene kompetencije u domenu efektivnog i efikasnog djelovanja u slučajevima migrantskih kriznih situacija, a u cilju jačanja kapaciteta država Zapadnog Balkana u rješavanju novonastalih kriznih situacija. Zašto ne reći da nam je namjera i stvaranje cijele jedne nove generacije budućih profesionalaca, koji će kroz institucije država iz kojih dolaze, a naročito koristeći svoje lične kontakte i ostvarenu saradnju, činiti značajn kohezivni faktor u regiji, kada je u pitanju efikasno djelovanje, ne samo u migrantskim krizama, već u svim kriznim situacijama koje mogu zadesiti Region.

Moguća migrantska kriza, kao i ostale različite krize uzrokovane društveno-političkim okolnostima ili prirodnim nesrećama, ne poznaju granice država u Regionu, niti njihove političke sisteme, njihovu ekonomsku moć i sposobnost upravljanja u vanrednim okolnostima. Krize se jednostavno događaju, štetno djeluju i obavezuju sve organe i nivoe vlasti da svoje ljudske potencijale i materijalne resurse stave u funkciju upravljanja, zaštite i spašavanja. Cilj nam je da polaznici ove Međunarodne ljetne škole savladaju osnove, odnosno, unaprijede svoja znanja u segmentu upravljanja u uslovima migrantskih kriza. Kontinuirana obuka, obrazovanje, organizovanje i pripremanje za postupanje u različitim mogućim scenarijima, neophodna je našim studentima, kao i svim ostalim zainteresovanim pojedincima, bili oni dio sistema ili ne.

Eminentni predavači Fakulteta za kriminalistiku, kriminologiju i sigurnosne studije Univerziteta u Sarajevu, Filozofskog fakulteta Univerziteta „Sv. Kiril i Metodij“ iz Skopja, Veleučilišta Velika Gorica iz Hrvatske, kao i različiti stručnjaci iz prakse iz Makedonije i Hrvatske, prenijeće svoja

bogata znanja i iskustva polaznicima ovog programa, te cijenim da je šestodnevna Međunarodna ljetna škola izvrsna prilika, kako za sticanje novih znanja i vještina, tako i za razmjenu iskustava, a svakako i za nova poznanstva i unapređenje saradnje u Regionu.

Fakultet za kriminalistiku, kriminologiju i sigurnosne studije ponosan je što se ovaj program koji su kreirali profesori našeg fakulteta realizuje kao internacionalni akademski program izvan Bosne i Hercegovine, te što su naši međunarodni partneri prepoznali njegov kvalitet i potrebu provođenja. Upravo međunarodna regionalna saradnja sa najuglednijim visokoškolskim ustanovama Zapadnog Balkana najbolji je put za dalji razvoj i promociju akademskih, nastavnih i naučnih kapaciteta Univerziteta u Sarajevu. Fakultet za kriminalistiku, kriminologiju i sigurnosne studije nastavlja širiti ideju međuregionalne saradnje, akademskog povezivanja i kontinuiranog spajanja mladih ljudi u regiji Zapadnog Balkana. Sretan sam što nas je sve više na tom putu, i radujem se da ćemo se ovog ljeta u što većem broju okupiti u Skopju.

DEKAN FAKULTETA ZA KRIMINALISTIKU, KRIMINOLOGIJU I

SIGURNOSNE STUDIJE

Prof. dr Nedžad Korajlić